



Baština Akademije nauka i umjetnosti Bosne i Hercegovine

Simpozijum o naučnoistraživačkom radu na polju ishrane stanovništva

Grujica Žarković

1972

Akademija nauka i umjetnosti Bosne i Hercegovine

<https://bastina.anubih.ba/items/5619dba6-6c83-45ca-bfcd-09bad44a804f>

Preuzeto s Baštine Akademije nauka i umjetnosti Bosne i Hercegovine

<https://bastina.anubih.ba/>

AKADEMIJA NAUKA I UMJETNOSTI BOSNE I HERCEGOVINE

POSEBNA IZDANJA
KNJIGA XVI
ODJELJENJE MEDICINSKIH NAUKA
KNJIGA 3.

SIMPOZIJUM
O NAUČNOISTRAŽIVAČKOM RADU NA POLJU
ISHRANE STANOVNIŠTVA
19. i 20. oktobar 1970. godine



Redakcioni odbor:

Grujica Žarković, Miroslav Radovanović,
Ratko Buzina i Momir Janjić

Urednik

Grujica Žarković,
vanredni član Akademije nauka i umjetnosti
Bosne i Hercegovine

SARAJEVO

1972

POZDRAVNA RIJEČ PROF. DRA GRUJICE ŽARKOVIĆA PRI OTVORENJU SIMPOZIJUMA

Poštovani gosti, učesnici i referenti na Simpozijumu,

Čast mi je da vas pozdravim u ime Međuakademijskog odbora za ispitivanje ishrane naroda i da otvorim Simpozijum o naučnoistraživačkom radu na polju ishrane stanovništva. Dozvolite mi da pojedinačno pozdravim nekoliko istaknutih gostiju i učesnika našeg Simpozijuma: dra Nikolu Georgijevskog, predsjednika Saveznog savjeta za zdravlje i socijalnu politiku, dra Srećka Korena, predsjednika Socijalnozdravstvenog vijeća Skupštine Slovenije, dra Sidu Marjanović, predsjednika Republičkog savjeta za naučni rad, druga Đorđa Gvozdrenovića, predsjednika Privredne komore SAP Vojvodine, i druga Osmana Derviševića, potpredsjednika Republičke privredne komore u Sarajevu. S nama je i potpredsjednik Saveza nutricionista drug Stojan Korać. U našem radu učestvuju i direktor Zavoda za zdravstvenu zaštitu Makedonije i pukovnik prof. dr B. Vračarić, direktor Higijenskog instituta Jugoslovenske armija, a u ime Akademije nauka i umjetnosti Bosne i Hercegovine njezin potpredsjednik dr Ethem Čamo.

Osnovna tema i svrha ovog Simpozijuma je da se u nekoliko referata i u slobodnoj diskusiji prikaže šta i kako može nauka da doprinese na planu unapređenja ishrane stanovništva naše zemlje. Ovakav cilj je svakako na prvi pogled prilično pretenciozan, pa sam stoga dužan da objasnim kako smo došli do ideje da raspravljamo o jednom ovako širokom problemu.

Prije dvije i po godine, zapravo u maju 1968, Savjet akademijâ nauka i umjetnosti SFRJ je osnovao Međuakademijski odbor za ispitivanje ishrane stanovništva. Odbor radi pod patronatom i uz pomoć Akademije nauka i umjetnosti Bosne i Hercegovine. Svaka akademija nauka je imenovala u njega, odnosno delegirala izvjestan broj lica bilo iz svog sastava ili iz redova vodećih nutricionista u našoj zemlji. Danas ovaj Odbor ima 15 članova i predstavlja kvalifikovano tijelo za razmatranje problema ishrane u Jugoslaviji.

Nakon svog formiranja Međuakademijski odbor se našao pred alternativom: da nastupi kao menadžer i organizator naučnog rada, te neposredno da preuzme neka istraživanja, ili da se pretvori u inicijatora naučnoistraživačkog rada i tijelo koje bi evaluiralo, podsticalo i koordiniralo djelatnost na ovom polju.

Međuakademijski odbor je pokušao da djeluje u oba pravca. Kada je Savezni fond za finansiranje naučnih djelatnosti objavio konkurs 1968. godine, u njemu je bila tema: »Upliv faktora ishrane na zdravlje, a na

ročito na rast i razvoj omladine«. Međuakademijski odbor je okupio desetak institucija i zajedno s njima je izradio jedan projekat. Taj projekat je primljen, sredstva su dobijena i istraživanja su u toku, ali Međuakademijski odbor se nije mogao pojaviti kao nosilac projekta, jer akademije nauka u Jugoslaviji nisu imale sredstava da participiraju obavezanih 20% rashoda. U takvoj situaciji Međuakademijski odbor je odlučio da ne nastupa više kao menadžer, nego je odlučio da bude pretežno inicijator istraživanja.

Razmotrivši naučnoistraživački rad na polju ishrane u našoj zemlji, Odbor je ocijenio da ono što je rađeno naučnoistraživački u prošlosti nije adekvatno po izboru tematike i po opsegu istraživanja i potrebama naše zemlje. Drugim riječima, zbog nekih razloga nauka nije bila dovoljno uključena u rješavanje otvorenih pitanja ishrane u našoj zemlji. Radi toga je Međuakademijski odbor odlučio da, prije nego što pride davanju nekih prijedloga, vidi šta je dosada rađeno, šta se u svijetu radi, i šta bi trebalo u našoj zemlji raditi; kakve su današnje mogućnosti naših instaliranih istraživačkih kapaciteta i šta bi trebalo još učiniti i koji su prioriteta problema koje bi trebalo rješavati, da bi se pružila adekvatna pomoć prehrambenoj industriji, planerima ishrane i javnoj ishrani. Da bismo mogli koliko-toliko kvalifikovano raspravljati o tim problemima, Međuakademijski odbor se obratio izvjesnom broju naših stručnjaka da pripreme referate. To su referati koje vidite u programu današnjeg Simpozijuma. To su: pregled tekućeg istraživanja u toku posljednjih 25 godina kod nas, poseban pregled problematike ishrane djece, naročito malog djeteta, pregled problema primjene nauke i, napokon, prijedlog platforme odnosno dugoročnog programa za naučno istraživanje na polju ishrane. Krajnji cilj ovog Simpozijuma je da u zaključcima koje ćemo donijeti dade platformu za istraživanje i da nam pruži mogućnost da porazgovaramo o tome ko je sve zainteresovan za rezultate i kako bi se u budućnosti moglo organizovati finansiranje ove djelatnosti pa da ovaj čitav posao krene onakvim tempom kako odgovara interesima naše zajednice.

Prije nego pređemo na rad, neophodno je da izaberemo tijela koja će rukovoditi radom Simpozijuma. Trebalo bi izabrati: radno predsjedništvo, izvjestioce pojedinih naselja, odbor za zaključke i redakcioni odbor. (Simpozijum se saglašava.)

Ako dozvolite, ja ću predložiti neka imena, s tim da svako slobodno može predložiti druga imena. Za radno predsjedništvo nemamo, na žalost, 5 stolica koliko bi nam trebalo da zadovoljimo princip pariteta postojećih akademija nauka. Zato predlažem da izaberemo tri predsjedavajućih, i to: akademika prof. M. Sarvana, akademika prof. D. Borića i, ako dozvolite, mene. (Simpozijum se saglašava.)

U Odbor za zaključke predložio bih slijedeće ličnosti: prof. Ratku Buzinu, prof. Miroslava Radovanovića, dra Momira Janjića, prof. Ivana Bonača i dra Anu Brodarec. U Odbor za zaključke može da uđe i više članova, ukoliko to želite. (Simpozijum se saglašava.)

Dužnost Redakcionog odbora će biti da preuzme referate koji će biti ovdje podneseni i da preuzme snimke diskusija i obezbijedi da se čitav materijal priredi za štampu. Akademija nauka i umjetnosti BiH će radove, diskusije, zaključke i dr. materijale sa ovog Simpozijuma izdati kao jednu od svojih edicija. Tehničku redakciju će da završi naša

Akademija nauka. Mislim da bi bilo najbolje da u Redakcionom odboru budu lica koja su izradila referate, tj. profesori Radovanović i Buzina i asistent Janjić. (Simpozijum se saglašava.)

Prije prelaska na rad naš skup još žele da pozdrave u ime domaćina Akademije nauka i umjetnosti BiH dr Ethem Čamo, te u ime Saveznog savjeta za zdravstvo i socijalnu politiku dr Nikola Georgijevski. Molim akademika Čamu da uzme riječ.

